

TILSKIPUN FRAMKVÆMDASTJÓRNARINNAR 2003/13/EB

2005/EES/49/12

frá 10. febrúar 2003

um breytingu á tilskipun 96/5/EB um unnin matvæli með korn sem uppistöðu og barnamat fyrir ungbörn og smábörn (*)

FRAMKVÆMDASTJÓRN EVRÓPUBANDALAGANNA
HEFUR,

með hliðsjón af stofnsáttmála Evrópubandalagsins,

með hliðsjón af tilskipun ráðsins 89/398/EBE frá 3. maí 1989 um samræmingu laga aðildarríkjanna um sérfaði ⁽¹⁾, eins og henni var síðast breytt með tilskipun Evrópuþingsins og ráðsins 1999/41/EB ⁽²⁾, einkum 1. mgr. 4. gr.,

með hliðsjón af álitni vísindanefndarinnar um matvæli,

og að teknu tilliti til eftirfarandi:

- 1) Í 6. gr. tilskipunar framkvæmdastjórnarinnar 96/5/EB ⁽³⁾, eins og henni var síðast breytt með tilskipun 1999/39/EB ⁽⁴⁾, er kveðið á um að í unnum matvælum með korn sem uppistöðu og barnamat skuli ekki vera nein efni í því magni að stefnt geti heilsu ungbarna og smábarna í hættu.
- 2) Á grundvelli álita vísindanefndarinnar um matvæli frá 19. september 1997 og 4. júní 1998 er í tilskipun 96/5/EB kveðið á um almennt hámarksgildi leifa, sem nemur 0,01 mg/kg, fyrir hvert það varnarefni sem finnst í unnum matvælum með korn sem uppistöðu og barnamat.
- 3) Þegar um er að ræða fá varnarefni eða umbrotsefni varnarefna gæti hámarksgildi leifa, sem nemur 0,01 mg/kg, jafnvel orðið til þess, í verstu tilvikum, að farið sé yfir viðtekinn dagskammt að því er varðar ungbörn og smábörn. Þetta á við um varnarefni eða umbrotsefni varnarefna ef viðtekni dagskammturinn fyrir þau er undir 0,0005 mg/kg líkamsþyngdar.
- 4) Í tilskipun 96/5/EB er kveðið á um þá meginreglu að bannað er að nota þessi varnarefni í landbúnaðar-afurðir sem eru ætlaðar til framleiðslu á unnum matvælum með korn sem uppistöðu og barnamat. Umrædd varnarefni skulu skráð í VIII. viðauka við tilskipun 96/5/EB. Þetta bann þarf þó ekki að tryggja að afurðirnar séu með öllu án varnarefna af þessu tagi þar eð sum varnarefni menga umhverfið og leifar þeirra geta verið í viðkomandi afurðum.
- 5) Unnt er að vernda heilbrigði ungbarna og smábarna enn frekar með því að setja viðbótarkröfur og beita efnagreiningu til að ganga úr skugga um að þær séu uppfylltar án tillits til þess hver uppruni afurðanna er.

- 6) Flest varnarefnanna, sem um gildir að viðtekinn dagskammtur er undir 0,0005 mg/kg líkamsþyngdar, hafa þegar verið bönnuð í Bandalaginu eða verða bönnuð eigi síðar en í júlí 2003. Bönnuðu varnarefni skulu hvorki greinast í unnum matvælum með korn sem uppistöðu né barnamat þegar notuð er fullkomnasta greiningartækni sem völ er á. Sum varnarefni brotna þó hægt niður og menga umhverfið áfram. Þau gætu því verið í unnum matvælum með korn sem uppistöðu og barnamat þótt þau hafi ekki verið notuð við framleiðslu þeirra afurða sem eru notuð í þessi matvæli. Tilhögun við eftirlit verður alls staðar að vera eins.

- 7) Þar til framkvæmdastjórnin hefur skorið úr um hvort leyfð varnarefni uppfylli öryggiskröfurnar í 5. gr. tilskipunar ráðsins 91/414/EBE frá 15. júlí 1991 um markaðssetningu plöntuvarnarefna ⁽⁵⁾, eins og henni var síðast breytt með tilskipun framkvæmdastjórnarinnar 2003/5/EB ⁽⁶⁾, skal leyfa notkun þeirra áfram, að því tilskildu að leifar þeirra fari ekki yfir þau hámarksgildi leifa sem kveðið er á um í þessari tilskipun. Hámarksgildi skulu ákvörðuð þannig að tryggt sé að ekki sé, í verstu tilvikum, farið yfir viðtekinn dagskammt að því er varðar ungbörn og smábörn.

- 8) Breyta ber tilskipun 96/5/EB til samræmis við þetta.

- 9) Ráðstafanirnar, sem kveðið er á um í þessari tilskipun, eru í samræmi við álit fastanefndarinnar um matvælaferli og heilbrigði dýra.

SAMBÝKKT TILSKIPUN ÞESSA:

1. gr.

Eftirfarandi breytingar eru gerðar á tilskipun 96/5/EB:

1. Ákvæði 6. gr. breytist sem hér segir:

— Eftirfarandi komi í stað 1. mgr.:

„1. Í unnum matvælum með korn sem uppistöðu og barnamat skulu ekki vera nein efni í því magni sem stefnt getur heilsu ungbarna og smábarna í hættu. Hámarksgildi, sem nauðsynlegt er að ákvarða fyrir önnur efni en þau sem um getur í 2. og 3. mgr., skulu ákvörðuð án tafar.“

(*) Þessi EB-gerð birtist í Stj. 41, 14.2.2003, bls. 33. Hennar var getið í ákvörðun sameiginlegu EES-nefndarinnar nr. 107/2003 frá 26. september 2003 um breytingu á II. viðauka (Tæknilegar reglugerðir, staðlar, prófanir og vottun) við EES-samninginn, sjá *EES-viðbætur við Stjórnartíðindi Evrópusambandsins* nr. 64, 18.12.2003, bls. 13.

⁽¹⁾ Stj. 186, 30.6.1989, bls. 27.

⁽²⁾ Stj. 172, 8.7.1999, bls. 38.

⁽³⁾ Stj. 49, 28.2.1996, bls. 17.

⁽⁴⁾ Stj. 124, 18.5.1999, bls. 8.

⁽⁵⁾ Stj. 230, 19.8.1991, bls. 1.

⁽⁶⁾ Stj. 8, 14.1.2003, bls. 7.

— Eftirfarandi komi í stað 3. mgr.:

„3. a) Varnarefni, sem eru skráð í VIII. viðauka, skulu ekki notuð í landbúnaðarafurðir sem ætlaðar eru til framleiðslu á unnum matvælum með korn sem uppistöðu og barnamat. Eftirfarandi gildir þó um eftirlit:

i) varnarefni, sem eru skráð í töflu 1 í VIII. viðauka, teljast ekki hafa verið notuð ef leifar þeirra eru ekki í styrk yfir 0,003 mg/kg. Þetta gildi, sem er álitíð vera magngreiningarmörk efnagreiningarinnar, skal endurskoðað reglulega með tilliti til tækniframfara,

ii) varnarefni, sem eru skráð í töflu 2 í VIII. viðauka, teljast ekki hafa verið notuð ef leifar þeirra eru ekki í styrk yfir 0,003 mg/kg. Þetta gildi skal endurskoðað reglulega með tilliti til gagna um umhverfismengun.

Gildin, sem um getur í i- og ii-lið, eiga við um afurðir sem eru tilbúnar til neyslu eða endurgerðar samkvæmt fyrirmælum frá framleiðendunum.

b) Ef tekin er ákvörðun um að virkt efni verði ekki skráð í I. viðauka við tilskipun 91/414/EBE skal breyta VII. og VIII. viðauka við þessa tilskipun til samræmis við það að því er varðar þau varnarefni sem eru skráð í VII. viðauka.“

2. Í stað VII. viðauka komi I. viðauki við þessa tilskipun.

3. Í stað VIII. viðauka komi II. viðauki við þessa tilskipun.

2. gr.

1. Aðildarríkin skulu heimila viðskipti með afurðir sem samræmast ákvæðum 3. mgr. 6. gr. tilskipunar 96/5/EB eigi síðar en 6. mars 2004.

2. Aðildarríkin skulu banna viðskipti með afurðir, sem samræmast ekki ákvæðum 3. mgr. 6. gr. tilskipunar 96/5/EB, eigi síðar en 6. mars 2005.

3. gr.

Aðildarríkin skulu samþykkja nauðsynleg lög og stjórn-sýslufyrirmæli til að fara að tilskipun þessari eigi síðar en 6. mars 2004. Þau skulu tilkynna það framkvæmdastjórninni þegar í stað.

Þegar aðildarríkin samþykkja þessi ákvæði skal vera í þeim tilvísun í þessa tilskipun eða þeim fylgja slík tilvísun þegar þau eru birt opinberlega. Aðildarríkin skulu setja nánari reglur um slíka tilvísun.

4. gr.

Tilskipun þessi öðlast gildi á tuttugasta degi eftir að hún birtist í *Stjórnartíðindum Evrópusambandsins*.

5. gr.

Tilskipun þessari er beint til aðildarríkjanna.

Gjört í Brussel 10. febrúar 2003.

Fyrir hönd framkvæmdastjórnarinnar,

David BYRNE

framkvæmdastjóri.

I. VIÐAUKI

„VII. VIÐAUKI

Sértæk hámarksgildi leifa varnarefna eða umbrotsefna varnarefna í unnum matvælum með korn sem uppistöðu og barnamat

Efnaheiti	Hámarksgildi leifa (mg/kg)
Kadúsafos	0,006
Demeton-S-metýl/demeton-S-metýlsúlfón/oxýdemetonmetýl (hvort um sig eða sameiginlega, gefið upp sem demeton-S-metýl)	0,006
Etóprófos	0,008
Fípróníl (summa af fípróníli og fípróníldesúlfínýli, gefin upp sem fípróníl)	0,004
Própineb/própýlenþíóþvagefni (summa própinebs og própýlenþíóþvagefnis)	0,006“

II. VIÐAUKI

„VIII. VIÐAUKI

Varnarefni sem ekki má nota í landbúnaðarafurðir sem ætlaðar eru til framleiðslu á unnum matvælum með korn sem uppistöðu og barnamat*Tafla 1*

Efnaheiti (skilgreining leifar)

Dísúlfóton (summa af dísúlfótoni, dísúlfótonsúlfóxiði og dísúlfótonsúlfóni, gefin upp sem dísúlfóton)

Fensúlfóþíon (summa af fensúlfóþíoni, súrefnishliðstæðu þess og súlfónum þeirra, gefin upp sem fensúlfóþíon)

Fentín, gefið upp sem plúsjón trífényltíns

Haloxýfóp (summa haloxýfóps, salta þess og estra, þ.m.t. samrunaefnasambönd, gefin upp sem haloxýfóp)

Heptaklór og *trans*-heptaklórepxíð, gefið upp sem heptaklór

Hexaklórbensen

Nítrófen

Ómetóat

Terbúfos (summa af terbúfosi og súlfóxiði og súlfóni þess, gefin upp sem terbúfos)

Tafla 2

Efnaheiti

Aldrín og díeldrín, gefið upp sem díeldrín

Endrín“